

आकाशवाणी

- त्रै रोजा गुजरात दौरे पर गेदे प्रधानमंत्री नरेन्द्र मोदी होर अज्ज वनतारा च पशु राहत केन्द्र दा दौरा करगंन ते मगरा सोमनाथ मंदर जाइयै मत्था बी टेकगंन।
- ब्हाह दे प्रदूषण पर काबू करने लेई दिल्ली सरकारै 31 मार्च कोला बाद उत्थें 15 साल कोला परानी गड्डिडएं गी तेल पेट्रोल देने पर पाबंधी लाने दा फैसला लैता ऐ।
- मुल्खै च फरवरी म्हीने जीएसटी राजस्व 9.1 प्रतिशत दे उछाल कन्नै 1 लकख 84 जहार करोड़ रपे दर्ज कीता गेआ ऐ।
- मुख्य भरै च रमजान दा पवित्र म्हीना अज्जै थमां शुरू होई गेआ ऐ।
- आईसीसी चैंपियन्स ट्राफी च अज्ज दुबई च भारत दा मकाबला न्यूजीलैंड कन्नै होग।

<><><><><><>

**PM Gujrat Visit**

प्रधानमंत्री नरेन्द्र मोदी होर गुजरात दे त्रऊं दिनें दे दौरे लेई कल संजा'लै जामनगर पुज्जे। प्रधानमंत्री होर अगले दऊं दिनें दे दरान केई कार्यक्रमें च हिस्सा लैगन। मोदी होर अज्ज पशु राहत ते पुर्नवास केन्द्र वनतारा जांगन। एह्दे परैत ओह गिर नैशनल पार्क, सासन दा बी दौरा करगंन। प्रधानमंत्री होर अपने दौरे दरान राष्ट्री वनजीव बोर्ड दी बैठक दी अध्यक्षता बी करगंन। इस बोर्ड च सेना प्रमुख केई राज्यें दे प्रमुख, इस खेत्तर च कम्म करा'रदे गैर सरकारी संगठनें दे प्रतिनिधि, मुख् वन्य जीव वार्डन ते केई राज्यें दे सचिवें समेत 47 सदस्य न। मोदी होर सोमनाथ मंदर च पूजा अर्चना बी करगंन ते श्री सोमनाथ ट्रस्ट दी बैठक दी अध्यक्षता बी करगंन। प्रधानमंत्री होर इस ट्रस्ट दे अध्यक्ष बी हैन।

<><><><><><>

**PM-Agriculture**

प्रधानमंत्री नरेन्द्र मोदी होरें आखेआ ऐ जे इस ब'रे दे केंद्री बजट दा उद्देश्य राई-बाई आहले खेत्तर गी मता लचीला ते समृद्ध बनाना ऐ। कल राई-बाई ते ग्रामीण समृद्धि पर बजट परैत दे वेबिनार गी संबोधित करदे होई प्रधानमंत्री मोदी होरें आखेआ जे विकसित भारत दे लक्ष्य दी बक्खी बधने दा भारत दा संकल्प बड़ा स्पष्ट ऐ। उनें आखेआ जे अस्स इक नेह भारत दे निर्माण दी दिशा च किट्टे रलियै कम्म करा रदे आं जित्थे करसान समृद्ध ते सशक्त होन। उनें आखेआ जे राई-बाई गी विकास दा पैहला इंजन मनदे होई सरकार नै करसानें गी गौरव दा थाहर दित्ता ऐ। उनें आखेआ जे अस्स रलिये 2 लक्ष्यें बक्खी अग्गे बदा'रने आं जेड़े न-कृषि खेत्तर दा विकास ते ग्राएं दी खुशहाली। प्रधानमंत्री होरें आखेआ जे सरकारै पी.एम धन धान्य कृषि योजना दी घोषणा बजट च कीती ऐ जेदे अंतर्गत देश दे घट्ट कृषि उत्पादन आहले 100 जिलें पर ध्यान दित्ता जाग।

<><><><><><>

**Delhi Pollution**

राष्ट्रीय राजधानी दिल्ली च ब्हाह च प्रदूषण दे स्तर गी काबू करने लेई दिल्ली सरकारै फैसला लैता ऐ जे 31 मार्च कोला मगरा पेट्रोल पंपें पर 15 साल कोला परानी गड्डिडएं गी पेट्रोल-डीजल नेई दित्ता जाग। दिल्ली दे पर्यावरण मंत्री मनजिंदर सिंह सिरसा होरें प्रदूषण दे मुद्दे पर सरबंधी अफसरें कन्नै होई दी बैठक दे परैत इस समस्या कन्नै निबड़ने लेई केई उपाएं दी घोषणा कीती। बैठक दे बाद सिरसा होरें आखेआ जे सरकार पेट्रोल पंपें पर ऐसे उपकरण लाने जा'रदी ऐ जिंदी मदद कन्नै 15 ब'रे कोला परानिएं गड्डिडएं दा अपने आप तुरत पता लग्गी जाग। उनें अग्गे आखेआ जे ऐसिएं गड्डिडएं दी पंछान करने ते शैहरें च उंदे दाखल होने पर रोक लाने लेई बी इक टीम खडेरी जाग।

<><><><><><>

## GST

फरवरी म्हीने च भारत दी सकल वस्तु ते सेवा कर यानि जीएसटी संग्रैह 1 लकख 84 ज्हार करोड़ रपे तगर पुज्जी गेआ, जेहड़ा पिछले ब'रे इस्सै म्हीने दी तुलना च 9.1 फीसदी मता ऐ। आंकड़े मताबक फरवरी च लगातार 12में म्हीने जीएसटी संग्रैह 1 लकख 70 ज्हार करोड़ रपे कोला मता होई गेआ। एह्दे च केन्द्री जीएसटी थमां 35 ज्हार 204 करोड़, राज्य जीएसटी थमां 43 ज्हार 704 करोड़, एकीकृत जीएसटी 90 ज्हार 870 करोड़ ते मुआवजे उपकर थमां 13 ज्हार 868 करोड़ शामिल न। फरवरी च कल 20 ज्हार 889 करोड़ रपे दा रिफंड जारी कीता गेआ ऐ।

<><><><><><>

## Telangana-VP

उपराश्ट्रपति जगदीप धनखड़ होर अज्ज तेलंगाना च आईआईटी हैदराबाद दे विद्यार्थिएं ते अध्यापकें कन्नै गल्लबात करगंन। संगारेड्डी दे जिला अधिकारी वी. क्रांति होरें उपराश्ट्रपति हुंदे दौरे दी पछझेकड़े च आईआईटी हैदराबाद दे अफसरें, पुलस ते कर्मचारिएं कन्नै बैठक लाइयै सुरक्षा ते होरने बंदोबस्तें दी समीक्षा कीती। सुरक्षा इंतजामें गी निग्गर बनांदे होई राजीव गांधी अंतर्राश्ट्रीय व्हाई अड्डे ते शमशाबाद इलाके उपपरा ड्रोन, परा ग्लाइडर ते माइक्रो लाइट ज्हाज समेत कुसै बी चाल्ली दी व्हाई डोआरी पर पाबंधी लाई दित्ती गई ऐ।

<><><><><><>

## Ramjan

देश भरै च अज्ज कोला रमजान दा पवित्र म्हीना शुरू होई गेआ ऐ। अज्ज पैहला रोजा होग। इस पवित्र म्हीने च लोक रातीं विशेष नमाज "तरावीह" अदा करदे न ते गरीबें गी दान दिंदे न। रमजान दे पवित्र म्हीने दे समापन पर ईद-दल-फितर मनाई जंदी ऐ। खाड़ी देशें च रमजान दा पवित्र म्हीना कल थमां शुरू होई गेआ हा।

<><><><><><>

## Gaza-Ceasefire

इजराइल नै रमजान दे म्हीने दे दरान गाजा च आरजी युद्धविराम दे प्रस्ताह गी मन्नी लैता ऐ। इजराइल दे प्रधानमंत्री बेंजामिन नेतन्याहू हुंदे दफतर दे ब्यान मूजब इजराइल नै अमरीकी दूत स्टीव विटकौफ हुंदे युद्धविराम दी मियाद गी बधाने आले बचार गी मन्ने दे होई ओह्दा अमल करना मन्नी लैता ऐ। इजराइल दा एह् फैसला इस बेल्ले आया ऐ जिसलै पैहले गेड़ च मन्ने गेदे युद्धविराम दी मियाद खत्म होने आली ही। प्रधानमंत्री दे दफतर नै आखेआ जे इजराइल विटकौफ हुंदी योजना दे तैह्त हमास कन्नै तुरत गै गल्लबात करोग जेकर हमास एह्दे लेई राजी होई जंदा ऐ।

<><><><><><>

## Ukraine Prez. UK

यूक्रेन दे राश्ट्रपति वोलोदिमीर जलेंस्की होरें कल लंदन च बरतानिया दे प्रधानमंत्री कीर स्टारमर हुंदे नै मलाटी कीती। बैठका च बरतानिया नै यूक्रेन गी 2 अरब 80 करोड़ डॉलर दा दोहार देने पर सैह्मति प्रगट कीती। राश्ट्रपति जलेंस्की होरें आखेआ जे एह् दोहार यूक्रेन दी रक्षा छमताएं च बाद्धा करोग ते इस दोहार गी ओह्दे आस्सेआ जब्त कीती गेदिएं रूस दिएं संपत्तिएं गी बेचियै चकाया जाग। उनें अग्गे आखेआ जे इस पैहे दा इस्तेमाल यूक्रेन च थेआर बनाने दे कम्मै लेई कीता जाग। एह् बैठक अमरीका दे राश्ट्रपति डोनाल्ड ट्रंप हुंदे कन्नै जलेंस्की हुंदी बैठक दे इक रोजा मगरा लग्गी ऐ, जेह्दे च दौनें नेताएं बश्कार गर्मोगर्मी आली बैह्स ते खुंदक दे बाद टकराव आली स्थिति पैदा होई गई।

<><><><><><>

## ICC-Trophy

आईसीसी ट्राफी च अज्ज दुबई च भारत दा मकाबला न्यूजीलैंड कन्नै होग। मैच भारतीय समें मताबक दपैहरी मगरा ढाई बजे शुरू होग। दवै टीमां पैहले गै सैमीफाइनल च अपनी थाहर पक्की करी लैती दियां न। अज्जै दा मैच जित्तने आली टीम मंगलवारें सैमीफाइनल च आस्ट्रेलिया कन्नै खेडोग ते अज्ज होरने आली टीम दा मकाबला बुधवरें दक्खन अफ्रीका कन्नै होग। तोआई कल रातीं कराची च दक्खन अफ्रीका नै इंग्लैंड गी 7एं विकटें कन्नै हराइयै सैमीफाइनल च प्रवेश कीता। इस जित्त कन्नै दक्खन अफ्रीका दी टीम गुप-बी च सब्बने शा उप्पर पुज्जी गई ऐ।

<><><><><><>

## WPL

महिला प्रीमियर लीग दे इक मैच च कल दिल्ली कैपिटल्स नै रॉयल चैलेंजर्स बेंगलुरु गी 9 विकटें कन्नै हराई दित्ता। जंदी रातीं बेंगलुरु दे एस.चिन्नास्वामी स्टेडियम च खेड्डे गेदे इस मैच च पैहले बल्लेबाजी करदे होई बेंगलुरु दी टीम नै 20एं ओवरें च 5 विकटें दे नुकसान च 147 रंज बनाए जेहूदे परते च दिल्ली दी टीम 15 ओवर ते 3 गेदां खेड्डियै शडी इक विकट मोआइयै 151 रंज बनाइयै मैच अपने नां करी लेआ। दिल्ली लेई शिफाली शर्मा ने 43 गेदें च 80 ते जेस जोनासेन नै 28 गेदें च 61 रंज बनाए। एहूदे कन्नै गै दिल्ली कैपिटल्स नै प्ले ऑफ च अपनी थाहर पक्की करी लैती ऐ।

<><><><><><>

## Weather

मौसम विभाग नै अज्ज लक्ष्मीप च बक्ख-बक्ख थाहरें पर तेज बरखा दे आसार दस्से न। असम, मेघालय, नागालैंड, मणिपुर, मिजोरम, त्रिपुरा, अरुणाचल प्रदेश, केरल ते माहे च टांवी-टांवी थाहरें गर्जी चमकियै बरखा बरी सकदी ऐ। एहूदे इलावा कर्नाटक दे समुंद्रे कन्नै लगदे केई इलाकें च अज्ज पूरी ध्याडी गर्म ब्हाह चली सकदी ऐ। मौसम विभाग नै कोकण ते गोवा च कल संजा तगर गर्मी ते गुम्मे आली स्थिति बनी सकने दे बर आसार दस्से न।

<><><><><><>